

Rudy Lampe ta na favor di dolariza Aruba



Ya na 2009 partido RED a pronuncia su mes na favor di dolariza Aruba y awor na 2014 e ta birando un opcion viabel. Mescos cu na 2009 partido RED a boga pa un vakminister di finanzas y awe na 2014 nos tin un vakminister di finanzas. Kico kier meen dolariza y pakico mester dolariza? Dolariza kier meen cu bo ta aboli bo florin Arubano y bo ta laga dollars Americano circula libremente den bo pais. Nos tin un ehempel concreto, Boneiro a dolariza, kier meen bo moneda nacional ta bira e dollar Americano. Tur salario ta wordo paga na dollars; tur articulo di compra ta na dollars. Aruba por haci'e pasobra nos industria ta turismo y turismo ta trece dollars den bo pais. Nos tin cu siña di e fout di Boneiro cu no a tuma medida pa evita cu abuso di prijs ta tuma lugar. Mester decreta un fase di transición unda ta tuma diferente medida cu e prijs na florin no ta djis wordo cambia den e mesun suma na dollars. Mester evita cu diripiente costo di bida ta bira mas caro y tin diferente manera pa logra esaki. Awor cu Aruba ta den un caos financiero y cu pronto Cft lo presenta su rapport cu diferente recomendacion, dolariza Aruba ta bira un 'must'. A keda comproba cu nos politiconan tin man los y nan no por maneha financieramente nos país di un manera responsabel.

"Wie niet horen wil moet voelen", dolariza ta un manera pa mara e mannan di nos politiconan pa nan no malgasta placa di pueblo. Door cu bo no por print florin mas; bo ta haya bo como gobernante obliga pa ta zuinig cu bo gastonan ya cu bo entradanan ta na dollars y e cantidad di dollar ta limita. Cada vez bo tin cu ahusta bo gastonan pa no come tur e reserva di dollars. Mal gobernacion di gobernantenan y cu un pueblo cu ta sigui vota pa mal gobernacion ta hiba na e caos financiero cu nos ta den y unda bo florin tin peliger di perde tur valor. E ventaha pa e ciudadano cu dolariza ta cu no tin e peliger mas di un devaluacion. Nos tur sa cu devaluacion ta hiba na pobreza generaliza. Si sigui asina cu finanzas publico bo florin ta bira 'waardeloos' y e ora ta mihor pa dolariza. E ta un medida pa protege e pueblo tambe contra su mes, lo bo no por haya fianza asina fácil na dollars djis pa fiesta y lo bay tin restriccion pa manda dollars afor. Bo Banco Central lo desaparece, lo bay bin un entidad nobo mas chikito y menos costoso pa monitor e fluho di dollars y e desaroyo internacional. Trahadornan di Banco Central por haya trabao na e entidad nobo aki. Laga nos pone sintimentonan nacionalista un banda y scoge pa un mihor futuro. Dolariza kier meen menos autonomía, pero esey ta un bendicion pa bienestar di pueblo. Menos autonomía ta un mal noticia pa politiconan pasobra nan ta perde poder. Ban kita poder for di nos politiconan pasobra nan a demostra cu nan no por maneha financieramente di un manera responsabel nos pais. Dolariza na Aruba kier meen cu bo debe nacional lo baha a largo plazo drasticamente y cu mal gobernacion practicamente ta bira imposibel. Mi ta spera cu dolarizacion ta un di e recomendacionnan di e rapport di Cft.